

THE AMERICAN ARCHIVIST

vol. 27, 1964, Nr. 2

Drugi broj tromjesečnika *The American Archivist* za godinu 1964, obiluje u svom prvom dijelu raznolikim arhivističko-historijskim člancima, kao i vrlo zanimljivim bilješkama u drugom dijelu.

Zanimljiv je prilog Charlesa Muletta: *The »Better Reception, Preservation, and More Convenient Use« of Public Records in Eighteenth-Century England* (Bolje prihvaćanje, čuvanje i prikladnija uporaba spisa u Engleskoj u 18. stoljeću).

Autor je profesor historije u SAD, a specijalizirao se za englesku povijest. Mulett se za naslov svoga članka poslužio tekstom odluke parlamenta koji je za »smještaj, za bolje prihvaćanje i prikladniju uporabu«, spojivši nekoliko kolekcija, osnovao god. 1753. Britanski muzej. U članku autor na zanimljiv način i sa puno vrlo korisnih podataka iznosi historijat čuvanja spisa u Engleskoj u 18. stoljeću. Govori o njihovoj nesigurnoj sudbini, o njihovom sređivanju, o njihovom korištenju za proučavanje pojedinih historijskih događaja u Engleskoj toga vremena.

Pisac daje i vrlo koristan prikaz engleske historiografije, toga i ranijeg vremena, za koju drži da daleko zaostaje za onom u drugim zemljama zapadne Evrope. Članak obiluje podacima, bilješkama, literaturom.

U prilogu *The Prehistory and Origins of the National Historical Publications Commission* (Prehistorija i osnivanje Odbora za publikacije nacionalne historije) poznati američki historičar i arhivist Waldo Gifford Leland opširno iznosi historijat postanka navedene komisije, koja je osnovana 1950. god.

Članak je uglavnom posvećen i govori najviše o Johnu Franklinu Jamesonu (1859—1937), vrlo zaslužnom historičaru i arhivisti, koji se još od kraja prošlog stoljeća zalagao za osnivanje jednog takvog odbora. J. Jameson aktivno se bavio historijom i arhivistikom.

Zaslužan je za osnivanje Američkog historijskog društva 1884. godine, čiji je bio i predsjednik 1907, a od 1895—1928. god. bio je glavni urednik *American Historical Review*. Autor članka iznosi njegove zasluge za promicanje historije i arhivistike u Americi kao i njegove radove o historiji Amerike.

Govoreći o historijatu Odbora za publikacije nacionalne historije, pisac potcrtava da Jameson, na žalost, premda je uložio veliki trud za osnivanje jedne takve komisije, nije doživio njegovo realiziranje, jer ga je prije njegova osnutka zatekla smrt.

I u ovom broju *The American Archivist* publiciran je članak o jednoj privatnoj kolekciji arhivalija koja se nalazi u biblioteci Huntington. Radi se naime o zbirci Williama Jonesa Rheesa (1803—1907.) koji je bio bibliograf-arhivist Smithsonian Instituta. Nathan Reingold, autor članka, iznosi historijat i detaljni sadržaj kolekcije, čiji spisi obuhvaćaju razdoblje od 1763—1904. god, a najrazličitijeg su sadržaja.

Posebno je instruktivan drugi dio časopisa, u kojem se donose opširni prikazi raznih historijskih i arhivističkih publikacija.

Osim toga zanimljiv je i koristan dio časopisa u kojem su objavljeni izvaci iz strane arhivističke periodike na preko 11 stranica. Časopis, kao i obično, donosi nastavak arhivističke bibliografije, obuhvaćajući ovaj puta razdoblje od mjeseca jula do decembra 1962. godine. Naročito su interesantne bilješke o raznim tehničkim novitetima u vezi s arhivskom službom.

J. Stanković